

共同經課-1 以賽亞書六十一章十～六十二章三節

10 我因為耶和華大大歡喜，我 ê 心神因為我 ê 上帝就快樂；因為祂用拯救做衫 kā 我穿，用公義做袍 kā 我 moa，親像新 kiáⁿ 婿戴 súi ê 帽，koh 親像新娘裝飾寶物。11 因為土地怎樣 hō 百項 ê 五穀 puh 芽，園怎樣 hō 所種 ê 發生，主耶和華也 beh án-ni hō 公義 kap o-ló 發生 tī 萬國 ê 面前。1 我因為錫安 ê 緣故的確無靜靜，因為耶路撒冷 ê 緣故的確無歇暍，直到伊 ê 公義親像光 teh 發出，伊 ê 拯救親像燈 teh tóh。2 列國 beh 看你 ê 公義，列王 beh 看你 ê 榮光；你 beh 得 tiòh 稱呼新 ê 名，就是耶和華親嘴所稱呼 ê。3 你 beh tī 耶和華 ê 手中做 súi ê 王帽，tī 你 ê 上帝 ê 手掌做冕旒。

共同經課-2 詩篇一百四十八篇

1 Lín tiòh o-ló 耶和華。 Tùi 天頂 o-ló 耶和華； Tī 高 ê 所在 o-ló 伊。2 伊 ê 眾使者 ah，lín tiòh o-ló 伊。伊 ê 眾天軍 ah，lín tiòh o-ló 伊。3 日 kap 月 ah，lín tiòh o-ló 伊；發光 ê 星辰 ah，lín lóng tiòh o-ló 伊。4 天頂 ê 天，kap 天以上 ê 水 ah，Lín lóng tiòh o-ló 伊。5 Chiah-ê lóng tiòh o-ló 耶和華 ê 名；因為伊一下命令，就 lóng 受創造。6 伊將 chiah-ê 建立，到永永遠遠；伊有定例，boē 會廢無。7 Tùi 地上 tiòh o-ló 耶和華，就是大魚 kap 一切 ê 深淵；8 火 kap 冰雹，雪 kap 雲霧；Thàn 伊 ê 話 ê 狂風；9 大山 kap 一切 ê 小山；結果子 ê 樹，kap 一切 ê 柏香樹；10 野獸 kap 一切 ê cheng-siⁿ；蟲 thoā kap 飛鳥；11 世上 ê 君王 kap 萬民；貴族 kap 世上一切 ê 審判官；12 少年人 kap 在室女；老人 kap gín-ná；13 Chiah-ê lóng tiòh o-ló 耶和華 ê 名；因為只有伊 ê 名受尊做高；伊 ê 榮光 poáⁿ 過天地。14 伊興起伊 ê 百姓 ê 角，Hō 伊聖 ê 百姓 lóng o-ló 伊，就是以以色列人，親近主 hit-ê 百姓。Lín tiòh o-ló 耶和華。

共同經課-3 加拉太書四章四～七節

4 但是到 hit-ê 時已經滿，上帝差伊 ê kiáⁿ，tùi 婦人人來出世，5 出世 tī 律法下，來贖回律法下 ê 人，hō 咱受設立做 kiáⁿ。6 為 tiòh lín 是做 kiáⁿ，上帝差伊 ê kiáⁿ ê 神入咱 ê 心，喉叫講，阿爸，父 ah。7 親像 án-ni，你 m̄ 是猶原做奴僕，就是做 kiáⁿ；既然做 kiáⁿ，就 tùi 上帝來做後嗣。

共同經課-4 路加福音二章二十二～四十節

22 照摩西 ê 律例，in 清氣 ê 日已經滿，就抱嬰 á 上耶路撒冷，beh 獻 hō 主，23 (照主 ê 律例所記載講，見若頭 chiūⁿ ê ta-po-kiáⁿ beh 稱做聖，歸 tī 主)，24 也 beh 獻祭，照主 ê 律例所講，用一對 ê Ka-chui，á 是兩隻鴿 á-kiáⁿ。25 Tú-tūg tī 耶路撒冷有一人，名叫西門；chit 人義 koh 敬虔，平時欣慕 hit-ê 安慰以色列 ê；聖神 tiàm tī 伊。26 伊 bat 得 tiòh 聖神指示，知伊 iáu-bē 死 beh 事先看見主 ê 基督。27 伊 hō 聖神感動就入殿；tú-á 耶穌 ê 父母抱嬰 á 入來，beh kā 伊照律法 ê 例來行，28 hit 時西門用手 chih 嬰 á，o-ló 上帝講，29 主 ah，taⁿ 照祢 ê 話 teh tháu 放你 ê 奴僕 安然過世。30 因為我 ê 目矙已經看見你 ê 拯救，31 就是你所備辦 tī 萬百姓 ê 面前 ê，32 做光來照外邦，Koh 做你以色列百姓 ê 榮光。33 伊 ê 父 kap 伊 ê 母 teh 奇怪所論嬰 á ê 話；34 西門 kā in 祝福，koh 對伊 ê 老母馬利亞講，Chit-ê 嬰 á 受設立 beh hō 以色列中 choē-choē 人跋倒，choē-choē 人起來，也做受辯駁 ê 記號；35 (koh 你家己 ê 心也 beh 有劍鑿透過)；hō choē-choē 人心內 ê 念頭會露出。36 Koh 有 A-siat ê 支派，Hoat-loē-lèk ê cha-bó-kiáⁿ，A-ná，伊是做先知，(年歲已經老，tùi 在室女 ê 時嫁 hō 丈夫七年久，37 就守寡八十四年)，lóng 無離開殿，禁食祈禱，暝日服事。38 Tú-tú hit 時伊進前，稱謝上帝，tùi 見若欣慕耶路撒冷得 tiòh 贖回 ê 人講起 chit-ê 嬰 á ê 事。39 In 照主 ê 律法行 tak 項 tī-chi 明白，tò 去加利利，到本城拿撒勒。40 嬰 á 漸漸大，日日勇壯，智慧充滿；上帝 ê 恩典 kap 伊 tī-teh。